

Nunat Avannarliit Killiit kaammattuutitut aalajangersagaannut nr. 1/2021-mut Inatsisartut tapersiinnaasaat pillugu Inatsisartut aalajangiiffigisassaattut siunnersuut:

**Avatangiisinut silap allanngoriartorneranullu ataatsimoorussamik iliuuseqarnissaq suleqatigiinnerulernissarlu anguniarlugit Savalimmiut Naalakkersuisuisa, Islandip Naalakkersuisuisa aamma Kalaallit Nunaanni Naalakkersuisut Nunat Avannarliit Killiit Siunnersuisoqatigiiffiata kaammattorpai. Nalinginnaasumik ukiumut ikinnerpaamik ataasiarluni avatangiisinut silap allanngoriartorneranullu nunani naalakkersuisuisa ataatsimeeqatigiittarnissaat Nunat Avannarliit Killiit Siunnersuisoqatigiiffiata kammattuutigaa. Ukiumoortumik ataatsimiinneerit siunertaraat nunat avannarliit killiit suleqatigiinnerisa siuarsarneqarnissat aamma avatangiisinut silap allanngorneranullu sammivilinnik oqaloqatigiittarnissaq, isumassarsianillu paarlaasseqatigiittarnissaq, ilisimasanik assigisaanillu paarlaasseqatigiittarnissaq**  
(Aallartitat siulittaasuut Pipaluk Lynge-Rasmussen).

### **Akissuteqaat**

(Nunalerinermut, Imminut pilersornermut, Nukissiutinut Avatangiisinullu Naalakkersuisoq)

### **Siullermeerinnineq**

Siunnersuummut siunnersuuteqartoq Naalakkersuisunit qutsavigaarput. Nunat avannarliit killiit avatangiisinut silallu pissusianut tunngasunik suleqatigiinnerulernissaannik anguniagaqartoqarnera Naalakkersuisunit taperserparput.

Nunat nunani avannarlerni killerniittut suleqatigilluarparput. Isummanik paarlaasseqatigiinneq kiisalu Islandimit Savalimmiunillu misilittakkanik atorluannissaq pingaartitorujussuarput. Silap pissusiata allanngoriartornera nunarsuarmit tamarmik ajornartorsiutigaat, taamaattumillu qanimut suleqateqarsinnaaneq – tamarmillu aaqqiissutissanik pinngortitamut avatangiisinullu innarliinngitsunik tunniussaqaarsinnaanissaat – pingaarutilerujussuuvog. Nunat avannarliit killiit avatangiisinut silallu pissusianut tunngasunut, tamarmik soqutigisaqarfigisaminnut, suleqatigiinnerulerpata, taava nunavut taakku pingasut politikikkut nukittunerulissapput, uagullu nunat avannarliit killerniittuusugut nunallu ilaanni ineriartornerup sunneeqataaffiginissaanut periarfissaqarnerulissallutik. Kalaallit Nunaanni silap pissusia pillugu periusissiap siullerpaap suliarineqarnissaa aallartisarpaput. Tassani tulluassaaq pingaaruteqarlunilu nunanit avannarlernit killerneersunit allanit misilittagaareersut isummallu pitsaasut atorluarnissaat.

Naalakkersuisunit sammisat allat pingasut aamma eqqaarusuppagut: Uumassusillit assigiinngissitaarnerat pillugu Naalakkersuisut periusissiaat, aalisarnermi piniarnermilu atortut annaasat qimaannakkallu pillugit Naalakkersuisut iliuusissatut pilersaarutaat kiisalu plastikkinik atuinikinnerulernissamut Naalakkersuisut iliuusissatut pilersaarutaat. Suliat avatangiisinut tunngaqqissaartut pingasut, nunallu avannarliit killiit peqatigalugit misilittakkanik avitseqatigiittarnissarput isummanillu paarlaaqatigiittarnissarput tassani pingaarluinnarpoq. Immitsinnut isumassarsitittarsinnaavugut ataatsimoorussanillu iliuusissanik aallartitsinnaalluta. Nunat killeqarfii akimorlugit ataatsimoorluta iliuusissanik silap pissusianut avatangiisinullu innarliinngitsunik siuarsaasinnaavugut. Taama iliortariaqarpugut kinguaariit maanna inuusugut kinguaassagullu eqqarsaatigalugit.

Naggataatigut erseqqissarusuppara ministerit ataatsimiinnerisa sapinngisamik najuutinngikkaluarluni internetti atorlugu ingerlanneqartarnissaannik nunat akornanni isumaqatigiittoqarnissaa Naalakkersuisunit pingaartikkatsigu. Nunarsuarmi Covid-19-imik nappaalanersuaqarnerata kingorna ataatsimiinnerpassuit ajornaquteqarpallaanngitsumik najuutinngikkaluarluni internetti atorlugu ingerlanneqarsinnaasut paasivarput. Najuutinngikkaluarluni internetti atorlugu ataatsimiinnerit silap pissusianut iluaqutaapput, pisortallu aningaasartuutaannut annikillisaataallutik, taamaattumillu misilittagaq taanna atorluartigu, ataatsimiinnernut ajornanngippat akornutaanngippallu.

Taamatut Naalakkersuisunit oqaaseqarluta siunnersuut akuersissutigineqassasoq inassutigaarput.